

BAHEBERE, TEMA YA BOBEDI ¹

 ...?...be a le fa ka tlelaseng gomme a ipshinne ka...
[Ga go selo go theipi—Mor.] Gomme bjale Puku ya pele ya Bahebere, ke Paulo, re hweditše, goba re a dumela. Baithutamodimo ba bofelong; ga ba tsebe feela efe, goba ke mang a E ngwadilego. Eupša, ke a dumela, mang kapa mang ka tlathotho ye nnyane ya semoya o tla bona e be e le Paulo. Go—go dumetšwe, ke bontši bja bangwadi go beng Paulo. Le ka fao gore o . . .

² Ka go tema ya 1, re hweditše gore e be e le go godiša Morena Jesu Kriste. Oo, ka fao a tlišitšego tlase, go bontšha ka bo—ka boitemogelo bjoo a bego a bile le bjona tseleng go ya Damaseko. Bjale, Paulo o be a le, le go thoma, moithutamodimo wa kgonth. Paulo o be a rutilwe ka tlase ga Gamaliele, yo mongwe wa barutiši ba bakaonekaone ba letšatši leo. Gomme o be a le monna wa setswererere le bohlale, gomme o be a le moithuti wa Beibele wa tsinkelo.

³ Gomme ke hweditše se, ge a be a le tseleng ya gagwe go theogela Damaseko, ka mangwalo ka potleng ya gagwe, go golega bohole bale bao ba bego ba le ka tseleng ya kgale ya go segofala ya Ebangedi, gomme monna o be a hломогиле. Eupša, ka mehla ke dumetše gore ge e sa le Paulo a bone Stefano a ehwa, ke a nagana seo se swanetše se mo amile thwi. Gomme o dumelanelane le lehu la Stefano, gomme o swere dikobo tša bale ba ba mo kgatlilego, gona Paulo o be a le molato wa madi a Stefano. Gomme o ipoletše, gomme o rile, “Ebile ga ke na maswanedi,” o rile, “gobane ke tšholotše madi a wa Gagwe—a wa Gagwe, mohwelatumelo, Stefano.” Gobane, o e hlatseditše.

⁴ Gomme ge o hlatsela go e ka ba eng, o no ba molato boka go beng motšeakarolo wa yona. Kafao ge re hlatsela, ra re, “Oo, ee, ba be ba se ba swanela go be ba dirile se, se se *bjalolebjalo*,” hlokomela se o se bolelago, gobane o molato ka tsela ye kahlolo ya gago e yago. Ge o sa kgone go tšea sephetho, se bolele selo, mno e tlogela e nnoši. Gona ge o hlatsela gore o Mokriste, gona o molato. Le a bona? O molato go beng Mokriste, gomme o swanetše go phelela go seo. Gomme ge Modimo a dira tshe—tshe Tshepišo ka Beibeleng... ke bona monna fa ka go setulo sa bagolofadi. Ge Modimo a dira Tshepišo, O molato wa Tshepišo yeo ntle le ge A E phethagatša. Modimo o molato ge A dira Tshepišo. Gomme Mangwalo a molato go fihlela A phethagatšwa. Le a bona? A—A thwi fale bjalo ka se—se setatamente seo Modimo a se dirilego. Gomme Se swanetše go phethagatšwa goba Modimo o molato. Le a bona?

⁵ Gomme kafao Paulo, go beng morutiši, le go tleng tseleng ya gagwe go ya Damaseko letšatšing lela, e ka ba, kgale e ka ba

nakong ya sekgalela, ke a akanya. Go bile le Seetša se segolo se phadimile go tšwa Magodimong, gomme Se mo foufaditše, gomme o—o wetše fase. Gomme o rile o nyakile go tseba e be e le Mang. O rile Segalontšu se boletše, gomme se rile, “Saulo, Saulo, gobaneng o Ntlhomaretše?” Ke a dumela tema ya 8 ya Ditiro.

Gomme o rile, “Ke Mang yoo ke mo hlomerego?”

⁶ Gomme Segalontšu se tlile morago, gomme se rile, “Ke nna Jesu.” Oo!, “Ke nna Jesu, gomme go a go thatafalela go raga seotledi.” Gomme Jesu o be a le eng nako yeo? Jesu, O be a le Seetša, feela Seetša se segolo se phadima go taga.

⁷ Bjale go re hloholeletše le go hwetša motheo fa. O be A le Seetša bjang, mola A be a le Motho? Bjale, ga a gona . . .

Go be go ne sehlopha sa mašole le Paulo, bahlapetši ba tempele, ba theoga go yo golega. Paulo o be a le mokapotene mogolo. Gomme ba be ba theoga go golega batho bale, bakeng sa masolo a bona le go ya pele, le bakeng sa kholofelo ya bona ya sedumedi yeo e letšego ka go bona.

⁸ Eupša, bjale, Jesu šole bjalo ka Seetša se segolo. Bjale, ge le elelwa, mo mathomong, Jesu o be a le Seetša. Jesu o be a le Logos yeo e tšwilego go Modimo. Gomme O be a le . . . O be a le Morongwa wa Kgwerano yoo a etetšegopele bana ba Israele go kgabola lešoka. Gomme O be a le Pilara ya Mollo yeo ba e lebeletšego. Gomme O be a . . . Gomme ge A be a le mo lefaseng mo, O rile, “Ke tšwa go Modimo, gomme Ke ya morago go Modimo.” Kafao ge A tšwile go Pilara ya Mollo, ka go Motho, gona ge A ile morago go moo A bego a le, O ile morago go Seetša gape. Gomme šole O be a le ge Paulo a Mmone, O be a le Seetša.

⁹ Bjale, mašole ale ohle ao a bego a ne Paulo ga se a bona Seetša. Gona go a kgonega gore o tee a ka Se bona gomme ba bangwe ba ka se Se bone? Ka nnete. Go lokile. Yena, Paulo, o Se bone, eupša ka moka ga bona ga se ba bona Seetša.

¹⁰ Bjale, ge Petro a be a le kgolegong, re hwetša Seetša se se tlile ka kgolegong, se butše mabati. Gomme o be a . . . Seetša sela se foufaditše bahlapetši ka moka, ge ba sepelela ntłe, Petro a sepela. Gomme ge a fihla lebating, le no ipulegela lonamong, ka setu, la tswalela ka morago ga gagwe. Go tloga kgolegong ya ka gare, o ile go lebati la ka ntłe. Le ipulegetše ka bolona, la tswalela ka setu. Gomme morago o ile go sekgala, o ile ntłe ka mokgotheng wa toropokgolo. Gomme o pikitlide mahlo a gagwe, o ka re o re, “Ke be ke lora?” O be a sa tsebe se se diregilego. Eupša, Morongwa wa Morena, Morongwa wa go swana yola a bego a le Pilara ya Mollo yeo e sepedišitše Moshe go lewatle le go le phatlalatša, oo, gomme Lewatle la go Hwa . . . Lewatle le Lehbedu le dirile leboto mahlakoreng a mabedi, gomme Israele e fetile.

¹¹ Gomme ge ba etla go Jorodane ye e phophomago, ga se A itira Yenamong go bonagala fale. Eupša O be a le gona, gobane O nno

e bula. Gomme ba tshetše ka Aporele, ge melala yohle e tletše ka meetse. Gomme O emišitše seruthwana, gomme O emišitše lehlwa go tologeng, gobane ga se e dire leboto godingwana le godingwana; e nno ema. Yoo ke Jehofa wa rena. Yoo ke Morena Jesu wa rena. E nno ema; gomme ba sepetše go tshela mo nageng e omilego.

¹² Bjale, Modimo o tshepišitše gore O tla ba hlokomela, kafao O be a tlemegile go Tshepišo ya Gagwe. Bjale, Paulo, a lemogile dilo tše, le go di tsebeng, o be a filwe monyetla, gobane Modimo o be a bolela thwi le Paulo. O be a sa bolele le mašole ao a bego a ne yena. O be a bolela feela le Paulo.

¹³ Bjale, ge—ge Morongwa wa Morena a theogile, ka sebopego sa naledi; le balebeleladinaledi, banna ba bohlale ba India, ge, ba bone Naledi yela le go E latela lebaka la dimaele tše makgolo. Gomme E ile ka godimo ga bohloladinaledi bjo bongwe le bjo bongwe, gobane ba bolokile nako ka dinaledi. Gomme ga a gona a bonego Naledi yela eupša banna ba bohlale. Oo, nna! A seo ga se le tsikinye? [Phuthego e re, “Amene.”—Mor.]

¹⁴ Ka gona, le a bona, Modimo ga a dirišane le mekgatlo. Ga A dirišane le dihlopha tša batho. O dirišana le motho ka motho. O ikutolla Yenamong go motho ka motho. Gomme bjale—bjale go bolela se, e sego se . . . Modimo o tseba pelo ya ka. Gomme go se bolele se bakeng sa wa ka mong, tumišo ya ka; bjale, feela go ba fale. Eupša, a le tsebile, Modimo yola wa go swana, Jesu yola wa go swana, o ne rena mosong wo? A le a tseba, yo mongwe le yo mongwe wa lena o ne ye nnyane, hlatse ya motho ka motho ya yona gonabjale, gore O fa? Gomme ke . . . O re diretše se sengwe mo letšatšing le seo A sa se dirago mo matšatšing a mangwe; O bile le Seswantšho sa Gagwe se tšewa mo letšatšing le. Re ne Sona se lekeletše *fale*. Le a bona? Pilara ya Mollo, Morena Jesu wa go swana.

¹⁵ Šetšang ka fao A šomago bjale. Ge eba A le Morena Jesu wa go swana, O tla dira dilo tša go swana, gobane Beibele e rile, “O a swana maabane, lehono, le neng le neng.”

¹⁶ Bjale, pele Paulo a ka tsebiša e ka ba eng, ge eba ye e be e le nnete goba phošo, sa pele o ile tlase ka Egepeta gomme o tšere mengwaga ye meraro, go hwetša ge eba e be e le Mangwalo goba aowa. A le kile la tseba seo? Ka morago ga tshokologo ya Paulo, o ile Egepeta lebaka la mengwaga ye meraro. O dutše fale, gomme fale ke moo a ithutilego bohlale bjo bogolo bjo.

¹⁷ Bjale, e se ka go bapiša go itšego, ke no le fa ka fao Moya wo Mokgethwa o sa dutšego wa go swana. Bjale, kereke ya ka fa e a elelwa, mengwaga ya go feta, ge Morongwa yo a bonagala gomme o be a tla bontšha dilo. Ke be ke E gononwa. Bohle ba lena le tseba seo, lena batala. Ge le . . . Ge seo e le nnete, phagamišang seatla sa lena, ge le kwele. Ya. Lebelelang, lebelelang kereke, efela, go tšwa go batala. Le a bona? Ke be ke gononwa, gobane

bareri ba mpoditše E be e le ya diabolo. Gomme ke bile mohuta wa go e dumela, eupša ke letile. Ke be nka se bolele selo ka Yona.

¹⁸ Eupša, oo, a go šegofatšweng Leina la Morena! Bošego bjo bongwe, O tla tlase, Morongwa, gomme o E utolotše ka Mangwalong, gore O be a le. Gomme ge ke E bone ka Mangwalong, kagona go thuntšha go kgabaganya lefase ka Ona, Molaetša.

¹⁹ Go tloga fao go tšwile Oral Roberts, A.A. Allen, Tommy Osborn, Tommy Hicks, le eng gape. Le a bona? Ke Molaetša go batho.

²⁰ Gomme Jesu o a swana maabane, lehono, le neng le neng. Ke go ya ka Mangwalo, O a swana. O dira go swana. O a swana. Gomme O ſoma go swana. O iponagatša Yenamong go swana. Gomme O fa, mosong wo, go swana. Bjale re ka Mmona; re ka no se. E ka ba eng e lego, re ne hlatse gonabjale gore O fa.

²¹ Bjale, re hwetša bjale gore, Paulo, godimo ga boitemogelo bjo, le go ngwaleng mangwalo a, bontši bja ona, go tšwa kgolegong, o be a bapeditše Testamente ya Kgale le ye Mpsha. Bjale, elelwang, mongwadi wa mafelelo wa Beibele ye, ka tšhušumetšo, Modimo o theogile gomme o mmoditše, “Ge motho e ka ba ofe a ka oketša e ka ba eng go Yona goba go tloša e ka ba eng go Yona, sa go swana se tla tlošwa go karolo ya Puku ya Bophelo, bakeng sa gagwe.” Kafao ga ra swanelo go oketša selo se tee go Yona. Oo, E swanetše go dula bjalo ka ge E le, ga gwa swanelwa go ba eng e oketšwa go Yona. Gomme re swanetše go lwela se sengwe le se sengwe seo se lego ka go Yona. Ga ke nyake eng bontši, gomme ga ke nyake eng bonnyane. Ke nyaka feela se E se bolelago.

²² Bjale, Puku ye ya Bahebere, lebaka ke E kgethile; morero o tee, selo se tee; lengwalo le, “Morategi Ngwanešu Branham,” le go ya pele. Gomme, ke—ke, re nyaka go dula le Lentšu.

²³ Bjale, tema ya 1, e be e le go godišwa ga Jesu, kafao Yena ke Yona kgwekgwe. Gomme Paulo o re dira go tseba, bošego bjo bongwe, gore O be a le ka go mathomo a magolo. Gomme re hwetša gore O be a se selo bonnyane go feta “Melekitsedeke, Kgoši ya Salema,” yo Mogolo wa tema ya 7.

²⁴ Gomme bjale, mosong wo, re Mmatamela go tloga go boemo bjo bongwe—bjo bongwe, go tšwa go tema ya 2. Bjale, morago ga ge Paulo a re fa wo mogolo wo, Molaetša wa go kgahliša, wa go godišeng Jesu, “Gomme ebile o dirile Barongwa go Mo khunamela.” Gomme ke a nagana, godimo fa, boka lefase, ka fao le tſofetše: “Gomme O tla le mena bjalo ka kobo, eupša ba tla senyega, eupša Wena o a šala.”

²⁵ Gomme godimo ka go tema ya 2, goba, temana ya 2, ke a dumela ke yona, “Yena matšatšing a O boletše le rena ka Morwa wa Gagwe.” Gomme, lebelelang, “Nakong ya kgale le ka mekgwa ya go fapano O boletše ka baprofeta.” Re ile go kgabola gomme

re hweditše se baprofeta ba bego ba le, le ka fao Modimo a tlišitšego Molaetša wa Gagwe ka baprofeta. “Eupša letšatšing le la mafelelo O boletše ka Morwa wa Gagwe, Jesu, ka Moya wo Mokgethwā. O boletše ka baprofeta, nako yela.” Kagona re tlide morago gomme re hweditše, baprofeta bale bohle ba bile le Moya wa Kriste ka go bona.

²⁶ Re ile morago go Josefa gomme re hweditše o kaile Kriste ka phethagalo. Ile morago go Moshe gomme re hweditše o kaile Kriste ka phethagalo. Kagona re theogela gona ebole go Dafida. Gomme ge Dafida a gannwe ka Jerusalema, a sa tsebe gobaneng, eupša o rotogetše thabeng gomme o lebeletše morago, godimo ga Thaba ya Mehlware, gomme o lletše Jerusalema gobane o be a gannwe. Mengwaga ye makgolo seswai go tloga nako yeo, Morwa wa Dafida o gannwe bjalo ka Kgoši, ka Jerusalema, gomme o dutše godimo ga thaba ya go swana gomme o llile. Oo, Moya wa Kriste, o mekamekana le motho ka motho!

²⁷ Bjale, Paulo o a thoma, go re:

*Kagona re swanetše go neela šedi ye kgolo go dilo tše
re di kwelego, . . .*

²⁸ Tema ya 2, bjale, re a thomiša.

*Kagona re swanetše go neela šedi ye kgolo go dilo tše
re di kwelego, ntle le . . . nako e ka ba efe re ka di lesa tša
thelela.*

²⁹ Oo, anke Modimo a kokotele yeo ka go tabarenekele ye mosong wo. Ke a rapela Moya wo Mokgethwā o tla nweletša seo go teba ka dipelong tša lena. “Re swanetše go neela šedi ye kgolo go dilo tše re di kwelego.” Ke mohuta ofe wa batho re swanetšego go ba, ge re bona Jehofa yo mogolo a theoga le go dira dilo tše A di dirago, le go di bona di bapeditšwe, Lengwalo ka Lengwalo, gore tšona ke Therešo? Gomme re dula tikologong boka ditlhokofele godimo ga kota, le go no se tshwenyege kudu. Re swanetše go ba matasatasa, motsotso wo mongwe le wo mongwe, re leka go tliša batho go Kriste. Re swanetše go ba matlapa a phelago. Ga ra swanela go tšwafa boka re le. Re tla ya godimo kerekeng, gomme re tla bona Morena Jesu a dira se sengwe, goba—goba a re šegofatša ka tsela yeo gomme kagona re tla—re tla ya morago gomme ra re, “Kopano ye bose kudu.”

³⁰ Bjale, go rerwa ga Lentšu, re ipshina ka gona, eupša seo ga se tabataba. Yeo ga se yona. Ga ra swanela go tumiša Morena feela ka morago ga ge re feditše go rera Lentšu, bjalo ka ge re dira ka mehla, go no Mo tumiša. Seo se a makatša. Eupša re swanetše go Mo tumiša iri ye nngwe le ye nngwe ya bophelo bja rena. Ge re le mošomong, re swanetše go Mo tumiša. Nako le nako ge monyetla o itliša, tumiša Morena ka go paka ka Yena.

Ge o bona, ba bangwe ba lena bahumagadi, le bona mosadi a le phošong, tumiša Morena ka go mo tše gomme o re, “Samme, go ne bophelo bjo bokaone go phala bjo.”

³¹ Lena banna kua mošomong, ge le ekwa monna a šomiša Leina la Morena ka lefeela, hwetša sebaka ka thoko gomme o ngwegele godimo, gomme o mo tsee ka seatla, o re, “Wena, go ne bophelo bjo bokaone go phala bjo. Ga se wa swanela go šomiša mantšu ao.” Gomme o mmotše ka ya bolo, tsela ye boleta. Dilo tseo tšohle ke go tumiša.

Gomme ge re bona yo mongwe a babja, gomme ngaka e re ga go sa na selo se ka dirwago, re swanetše go tumiša Morena ka go ba botša, “Go ne Modimo wa Legodimo yoo a arabago thapelo.”

³² Gomme ge re bona dilo tseo di direga, tseo re di bonago di direga le go dirwa, ga ra swanela go tsoge ra di lesa tša thelela. Re no di lesa go sepela ka menwana ya rena. Seo ke se e lego bothata ka kereke ya Pentecostal lehono. Ba lesitše yonayona kgwekgwe go thelela menwaneng ya bona, mola ba bile le yona ka diatleng tša bona. Eupša, lebelelang se ba se dirilego, ba dirile boka dikereke ka moka. “Ba kitimile ka moputsong- . . . ka tsela ya Kora, gomme ba senyegile; le ka tsela ya Kaine, gomme ba senyegile ka go kgano ya Kora.”

³³ Ba kgatlofaditše. Sebakeng sa go ba le bobanešu moo bohle re ka bago batee, ba ikgatlofaditše bonabeng. Ba dirile mekgatlo ye mennyan le diism tše dinnyane, gomme di no hloga go tšwa fale gomme tša thuba bobanešu. Gomme ge le sa šetše, Baptist le Mapresbyterian a ya go e topa, gobane, “Modimo o kgona go tsošetša Abraham bana ka matlapa a.” Gomme re—re e lesitše ya thelela go tšwa diatleng ka go se be batee.

³⁴ Maindia a lahlegetšwe ke naga ye go mothomošweu bjang? Ke ka gobane ba be ba se batee. Ge nka be ba bile le legora le tee le legolo . . . Eupša ba be ba elwa seng sa bona. Ba ka be ba tsetaletše ge nkabe ba tlie mmogo.

³⁵ Re ya go lahlegelwa ke yona bjang? Ka gobane ga re batee. Re lahlegelwa ke boitemogelo bja rena bjang le Modimo, ke ka gobane re a ahloganya. Re bea e tee, gomme ra bitša *ye me—me* Methodist, gomme *ye* Baptist, le *ye* Assemblies, le *ye* Oneness, le *ye sengwe gape*, le church of God, le Nazarene, le Pilgrim Holiness. Re aroganya Mmele wa Kriste. Ga ra swanela go tsoge ra arogana. Re ka no fapano ka dikgopolo, eupša a re beng banešu pelo ka pelo. Modimo o re nyaka go ba. O hwetše Kereke ya Modimo ka moka. Gomme ga re nyake go aroganywa.

Bjale *re swanetše go fa šedi ye kgolo . . . ntle le nako e ka ba efe re swanetše go di lesa tša thelela.*

Ka gore ge lentšu le boletšwego ke barongwa le be le title, . . .

³⁶ Le a E kwa? “Ge lentšu le boletšwego ke barongwa . . .” Bjale *morongwa* ke “motseta.” Lentšu morongwa le ra “motseta.” Gomme ke sa tšo fetša, ka go puku ya 1 fa, “Modimo, mo nakong ya kgale le ka mekgwa ye mentši, o boletše le botate ka baprofeta.” Bao ba be ba le batseta ba Modimo. Gomme ba be ba

le, ge eba ba be ba le batseta ba Modimo, ba be ba le barongwa ba Modimo. Motseta ke morongwa; goba morongwa ke motseta, a ke re.

³⁷ Motseta! O motseta, mosong wo. O . . . O motseta wa ditaba tše botse goba motseta wa ditaba tše mpe. Oo, a ga se mo gobotse, go tseba gore re baemedi, gore re barongwa, batseta ba tsogo? Gomme re batseta ba Modimo go lefase la sebe, gore Kriste o a phela. Ka dipelong tša rena, O a phela. Ka meboyeng ya rena, O a phela. Gomme O re tloša go tšwa bophelong bja kgobogo bja tlase bja sebe, gomme a re phagamišetša godimo, gomme a re fa "haleluya" ka disoulong tša rena, gomme a re dira dibopša tše mpsha. Re batseta, barongwa ba Kgwerano. Go makatša bjang!

³⁸ Gomme bjale, ka go Testamente ya Kgale, "Ge—ge lentšu le boletšwego ke barongwa le tiile," ka tsela yela go swanetše go loka. Ka go Testamente ya Kgale, pele lentšu la moprofeta le ka bonagatšwa, le be le swanetše go hlahlobja le go netefatšwa. Ba be ba sa hlepha ka lona, boka re le lehono.

³⁹ Go no ya ntle le go ba le mohuta e ka ba ofe wa maikutlo, goba e ka ba eng gape, "Oo, letago go Modimo, yeo ke yona!" O foſitše.

Beibele e rile, "Mo matšatšing a mafelelo, diabolo o tla ekiša Bokriste, kgauswi kudu, Go fihla go tla bona Bakgethiwa ge go kgonega." Yeo ke nnete. Kafao, re swanetše go e leka.

⁴⁰ Gomme ba e lekile bjang letšatšing la bona? Go Urim Thummim. Sephemafega sa Arone, seo se bilego le matlapa go sona: khabakele, jaspere, taamane, rupi, safire. Matlapa ale ohle, ao a emetše tswalo ya bapatriaka bale ba lesomepedi, a be a le sephemafegeng sa Arone. Gomme ge moprofeta a profetile, gomme Seetša sela se sekgethwa se phadimele go sona, Modimo o rile, "Yeo ke Therešo." Eupša, ga go kgathale go kgontha gakaakang go bonagetšego, ge go sa phadima go sela, e be e se Therešo. Kafao, Urim Thummim yela e ile le boprista bjola.

⁴¹ Eupša Beibele ye lehono ke Urim Thummim ya Modimo. Gomme ge moprofeta a profeta, go swanetše go phadima ka phethagalo le Beibele. Kagona, Modimo o a bolela, morago O a theoga le go E netefatša.

⁴² Oo, nka kgona bjang go tagafatša Modimo lehono! Ke nagana morago ka mosong wo mongwe wa Lamorena, e ka ba ka mokgwa wo, ge ke be ke tlogela tabarenekele. Gomme lena batho le be le lla le go nkogopela go se sepele. Eupša, ge, ke rerile ka Dafida le Goliate, le ka fao le bego le eya go lebana le la go tonya lela, lefase la diphapano leo le bolelagoo gore matšatši a mehlolo a fetile.

⁴³ Ke rile, "Go ne tšitsiripa e tee e kgolo, gomme ka pela ge re ka kgona go mmolaya, ka moka ga bona ba tla tšea maatla." Gomme Modimo o file yela. Gomme morago go bile le Oral Roberts le Jaggers, le go ya pele, ba gogile Tšhoša, gomme re lwele le lenaba

go tšwa nageng, ra tswalela melomo ya bona. Ba ka se kgone go bolela gore mehlolo ga e direge, gobane yona še. Kgonthe. Lentšu la Modimo la Gosafelego. Le phadimile go Urim. Le phadimile go Lentšu, leo ke Urim Thummim ya Gagwe. Gomme ge le phadimile go Yela, e be e le phosithifi.

Gomme go e ka ba mang yoo a hlokago, ge o le modiradibe, o nyaka go tseba o ka phološwa bjang, “Dumela go Morena Jesu Kriste.”

⁴⁴ Lehono, re ne dilo tše dintši kudu o swanetšego go di dira. “Swanetše go phetla letlakala le leswa. O swanetše go dira *se* le go dira *sela*, gore o phološwe.”

Ke nagana ka moletakgolego wa Filipi, ge moletakgolego yo a botšišitše Paulo, “Ke swanetše go dira eng go phološwa?”

Ge nkabe go bile wena goba nna, re ka be re mmoditše dilo tše a *se go* a swanela go di dira. “O swanetše go tlogela go nwa. O swanetše go tlogela go kempola ga gago, go kempola ga gago. O swanetše go tlogela *se*. O swanetše go tlogela *sela*.”

Paulo ga sa nke a mmotša seo. O nno mmotša dilo a *swanetšego* go di dira. “Dumela go Morena Jesu Kriste, gomme o tla phološwa.”

⁴⁵ Bjale, “Yo a kwago Mantšu a Ka gomme a dumela go Yena yo a Nthomilego o ne Bophelo bjo bosafelego.” Yeo ke Urim Thummim e phadima, Mokgethwa Johane 5:24. “Ke nna Morena yoo a fodišago malwetši a gago ohle.” Jakobo 5:14, “Bitša bagolo, ba ba tlotše ka oli, thapelo ya tumelo e tla phološa molwetši.” Urim e phadima. Le a bona? Leo ke Lentšu la Gosafelego la Modimo.

⁴⁶ Ga ke kgathale ke ba bakae baganamodimo, bahlokomodimo, basedumelemodimo, bagononi ba tsogago. Modimo o tla ema ka Lentšu la Gagwe. O tshepišitše O tla e dira.

⁴⁷ “Gomme re swanetše go fa šedi ye kgolo go dilo tše tše re di kwelego, ntle le ge nako e efe re di lesa di thelela. Ka gore ge lentšu le boletšwego ke barongwa (baprofeta) le be le tiile...” A ba be ba le? Re ka tšea beke go se.

⁴⁸ A le be le tiile ge Moshe a bolela? [Phuthego e re, “Amene.” —Mor.] Kgonthe le be le le.

Go ka reng ka Eliya, a dutše godimo ga thaba? Morena o mmoditše, “Rotogela fale, Eliya. Ke tla dula fale le wena; nyaka kopanelo e rilego.” Modimo o rata go kopanelo le batho ba Gagwe. Eupša re ka se dule botelele go lekanelo go Yena go kopanelo le rena. Re matasatasa kudu re tabogataboga gohle, go tloga lefelong go ya lefelong, le bontši kudu. “Dula go iketla, Eliya.” O nyakile mengwaga ye meraro le dikgwedi tše tshela ya kopanelo. Ga re kgone go mo fa metsotso ye meraro, le gannyane. Mengwaga ye meraro le dikgwedi tše tshela tša kopanelo ya

kgafetša. Oo, ke rata seo! O rile, “Se tshwenyege ka go apea; re tla ba le seo šetše se lokišitšwe. Magokubu a ya go go fepa. Gomme se sengwe le se sengwe se ya go loka. Ke no nyaka kopanelo.” Moprefeta wa kgale, Eliya, a dutše godimo fale ka godimo ga thaba, mola a be a kopanelo le Modimo, gobaneng, mokapotene o rile, “Ke a dumela ke tla rotoga le go mo tsea.” Bjale, o se tsoge wa leka go roba kopanelo yela.

⁴⁹ Kafao, mokapotene o tla godimo, sešole sa gagwe sa banna se segolo, ba masometlhano. Gomme o rile, “Ke—ke—ke tla go go tsea, Eliya.”

⁵⁰ Gomme Eliya o emeletše. Šetšang, moprefeta wa Morena šo! O rile, “Ge eba ke le mohlanka wa Morena, anke mollo o tšwe legodimong gomme o go metše.” Gomme mollo o theogile. Mokapotene o rile . . .

⁵¹ “Oo, o a tseba ke eng?” Kgoši, a ke re, o rile, “Yeo ka kgonagalo e be e le tla—tla tladi, feela legadima le no feta godimo, gomme la ba ratha. Ke tla romela ba masometlhano ba bangwe.”

⁵² Eliya o emeletše, yo mongwe wa barongwa, lentšu la gagwe le tiile. O be a swanetše go ba moputso wa maleba go se sengwe le se sengwe seo se dirilwego ka phošo. O rile, “Ge eba ke le mohlanka wa Morena, anke mollo o tle.” Gomme ba masometlhano ba bobedi ba tšhumilwe. Go lokile. Moputso wo mongwe le wo mongwe!

*Ka gore lentšu le boletšwego ke barongwa le be le tiile,
gomme karogo ye nngwe le ye nngwe le go se obamele
go hweditše moputso wa maleba . . .*

⁵³ Bjale, selo se segolo sese, temana ya go latela.

Re tla phonyokga bjang, . . .

⁵⁴ “Re tla phonyokga bjang?” Ge eba segalontšu sa Eliya se tlišitše tshenyego, ka gobane o be a le morongwa wa Morena, re tla phonyokga bjang ge Segalontšu sa Kriste se bolela? Goba, re ka palelwa bjang ge re rapeletše, ge eba E le Segalontšu sa Kriste? Ge eba Kriste o beetše Kereke ya Gagwe go rapelela balwetši, gomme Kereke e dira se A rego O . . . go bona go dira, gona E ka tsoge ya palelwa bjang? E ka se ke. O ka palelwa, eupša E ka se palelwe. Gomme ge feela o E boloka, E tla go tshediša.

⁵⁵ Ge o palelwa, o paletše wenamong. O no ya kgole le Lentšu. Eupša ge feela o dula le Lentšu, E ka se palelwe. Ka gore lentšu la baprofeta le dirile *bjalolebjalo*, ke bontši gakaakang Lentšu la Kriste le tla bago?

*Re tla phonyokga bjang, ge re hlokologa phološo ye
kgolo bjalo; ye e kua mathomong e thomilego go bolelwa
go rena ke Morena, gomme ya tiušetšwa go rena ke bona
bale ba mo kwelego;*

⁵⁶ Naganang ka Yona, e boletšwe ke Morena. Ke makga a makae re ka boelago morago? Re ka emiša kae, thwi fa bakeng sa iri? Ge Jesu a tlie, O a swana maabane, lehono, le neng le neng.

⁵⁷ Bjale, elelwang, mathomong e thomile go bolelwa ke Jesu, Yenamong, gomme morago ya tiišetšwa ke bona bale ba Mo kwelego. Bjale Mo theetšeng.

⁵⁸ Ge A tlie lefaseng, ga se A tteleima go ba mofodiši. O rile, “Ga se Nna yoo a dirago mediro; ke Tate wa Ka yoo a dulago ka go Nna. O dira mediro. Morwa ga a kgone go dira selo Yenamong, eupša se A bonago Tate a se dira,” Mokgethwa Johane 5:19.

⁵⁹ Šetšang ge Filipi a tlie go Yena. Nathaniele... Morago ga tshokologo ya Filipi, o ile godimo gomme o tlišitše Nathaniele. O rile, “Ebla, bona ke Mang re mo hweditšego: Jesu wa Natsaretha, Morwa wa Josefa.”

⁶⁰ Gomme o rile, “A go ne selo e ka sefe se sebotse se tšwago Natsaretha?”

⁶¹ O rile, “Ebla, bona.” Yeo ke tsela go kgodišwa: E netefatše. Ebla gomme o bone. Oo, seo ke bokaonekaone nkilego ka se kwa. Ebla gomme o ikhweletše wenamong. Se eme ntle gomme wa swaswalatša mo thoko ga mothalo, eupša, “Lekang dilo tšohle, gomme le swarelele go seo se lokilego.” Ebla gomme o bone.

⁶² Ba ile mmogo tseleng, ba bolela. Ge a sepeletše godimo ka Bogoneng bja Morena Jesu, O rile, “Bonang Moisraele yo ka go yena go sego bofora.”

⁶³ Go tlositše letlalo lohle go tšwa go yena, go nyakile. O lebeletše gohle, o rile, “Gabotse, Rabi, ke neng O kilego wa ke wa mpona? Ga se nke Wa ke wa mpona. O ntseba bjang?” Filipi o rile...

⁶⁴ “Pele, ge a bitša...” O rile, “Pele Filipi a go bitša, maabane ge o be o le ka tlase ga mohlare wa mogo, Ke go bone.” Amene.

⁶⁵ O rile, “Wena o Morwa wa Modimo. O Kgoši ya Israele.”

⁶⁶ Mosadi o sepeletše ka Bogoneng bja Gagwe, gomme O rile, “Sepela, tla le monnamogatša wa gago.”

O rile, “Ga ke naye.”

⁶⁷ O rile, “Yeo ke nnete. O bile le ba bahlano, gomme yo o phelago le yena bjale ga se wa gago. O boletše therešo.” Naganang ka yona.

⁶⁸ O rile, “Mohlomphegi, ke a bona gore O Moprefeta. Yoo, re a tseba gore ge Mesia a tlie O tla re botša dilo tšohle.”

⁶⁹ O rile, “Ke nna Yena, yo a bolelago le wena.”

⁷⁰ Gomme o kitimile gomme o boditše banna ba toropokgolo, “Etlang, bonang Monna Yo a mpoditšego tšohle ke di dirilego. A yo ga se Mesia?” E be e boletšwe ke Morena.

⁷¹ Go diregile eng? Jesu o rile, pele A tloga, “Dilo tšeо Ke di dirago, le tla di dira le lena.” A ke nnete? [Phuthego e re, “Amene.”—Mor.] “Dilo tšeо Ke di dirago le tla di dira le lena, ebile bontši go feta wo, gobane Ke ya go Tate.” Oo, ke kgona go ba bona ge ba eya pele, mogohle. Mareka 16, “Ba ile pele mogohle, ba rera; Morena a šoma ka bona, a tiišetša Lentšu.”

Gomme fa, Paulo, a efa selo sa go swana. O boletše gore e—e Ebangedi e thomile go rerwa ke Jesu, gomme ya tiišeletšwa go rena ke bale ba ba Mo kwelego. Leo ke Letlapa la Motheo. Oo, a go šegofatšwe Leina la Morena! Leo ke Letlapa la Motheo.

⁷² Gomme go nagana, mengwaga ye dikete tše pedi e fetile. Basedumele ba tsogile, le baganamodimo, le bagononi, le bahlokamodimo. Eupša lehono, Jesu yola wa go swana o tiiša Lentšu la Gagwe ka mokgwa wa go swana ka bale ba ba Mo kwago. “Mo kweng,” ga go re go kwa ther. Goo go ra, go kwa Yena. Ee.

⁷³ Re ka phonyokga bjang? Phonyokgo ya rena e kae? Oo, o re, “Šegofatša Modimo, ke nna wa kereke ya Methodist. Ke nna Mopresbyterian. Ke nna Mopentecostal.” Seo ga se na le selo se tee go dira le Lona. Gomme o tla ka thoko ga mothalo gomme o nyaka go O bitša “bomoya, goba gobalamonagano tsoko, goba diabolo tsoko,” goba se sengwe. Dihlong go bona!

⁷⁴ “Ge eba lentšu le lengwe le le lengwe le bile go tia ka barongwa . . .” Jesu o rile, “Ga se . . . Nakwana ye nnyane, gomme lefase le ka se Mpone gape. Efela, le tla Mpona, gobane Ke tla ba le lena, ebile ka go lena, go ya bofelong bja lebaka.” Gomme ge re Mmona a theoga, go tšwelapele go tiišetša Lentšu la Gagwe, re ya go phonyokga bjang ge eba re thekga kereke tsoko, goba mokgatlo tsoko, goba kerekela tsoko, goba tiori tsoko ye nnyane ya pepetletšo ya rena beng? Bokaone o hlephiše. “Ka gore sebe se sengwe le se sengwe se amogela mopuputso wa maleba ka tlase ga barongwa, ke bontši gakaakang ge Morwa wa Modimo a bolela go tšwa Magodimong, go dira Lentšu la Gagwe go bonagala! Re tla phonyokga bjang, ge re hlokomologa phološo ye kgolo bjalo?” Oo, nna! “Modimo gape . . .”

Temana ya 4:

Modimo gape a ba hlatsela, . . .

⁷⁵ Šetsang se. Modimo o ba hlatseditše. Oo, ke thabile kudu bakeng sa seo! Modimo o hlatseditše.

⁷⁶ Lebelelang. Ge Eliya a dutše mo thabeng, gomme o rile, “Ge eba ke le monna wa Modimo, anke mollo o we go tšwa Legodimong gomme o le metše.” Modimo o hlatseditše gore o be a le monna wa Modimo.

Modimo ka mehla o a hlatsetša. Bophelo bja gago bo a hlatsetša. Ga ke tsebe se bopaki bja gago e lego, eupša bophelo bja gago bo bolela godimo kudu, segalontšu sa gago ga se kgone

go kwewa. Eupša, go phela ga gago—ga gago, bophelo bja gago bja tšatši ka tšatši bo tla paka se o lego. Modimo o a hlatselša. Ee. Moya wo Mokgethwa ke setswalelo, gomme setswalelo se tšeа bobedi bja mahlakore a letlakala. Ba go bona o eme *fa* le go go bona ge o tloga. E sego feela ka kerekeng eupša go mošomong wa tšatši ka tšatši. O tswaleletšwe bobedi bja mahlakore, ka gare le ka ntle. Ka thabo yeo o nago le yona, le ka bophelo bjoo o bo phelago, o tswaleletšwe, ka gare le ka ntle, gore o a tseba o phološitšwe gomme lefase le a tseba o phološitšwe, ka bophelo bjoo o bo phelago, ka gore Modimo o a hlatsela. A go šegofatšwe Leina la Gagwe le Lekgethwa! Nna, ke ikwela bodumedi!

⁷⁷ Naganang ka yona, baena, fale. Oo! “Dinku tša Ka di kwa Segalontšu sa ka, gomme yo šele di ka se mo latele.” Oo, ka fao gore maina a rena a mo diatleng tša Gagwe! Le pele ga Gagwe, mosegare le bošego. Lentšu la Gagwe ka mehla le pele ga Gagwe, Tshepišo ya Gagwe. Ga A kgone go e lebala. Gomme O a le rata.

⁷⁸ Bjale, O tla hlatsela ba Gagwe mong. Ga o bule molomo wa gago gomme wa bolela lentšu, lefase le tla tseba se sengwe se diregile go wena.

...rwala bohlatse, bobedi ka maswao le matete, le ka
mehlolo ye mentši, le dimpho tša Moya wo Mokgethwa,
go ya ka thato ya gagwe mong?

⁷⁹ A re no tšeang Lengwalo le tee bjale pele re tswalela; mo Letšatšing la Pentecost, ge ba amogetše Moya wo Mokgethwa. E ka ba matšatši a mane moragorago, Petro o be a fetile go kgabola keiti e bitšwago ye Botse; yena le Johane. Ba rile, “Re lebelele,” go monna. Gomme o rile, “Silibere le gauta ga ke natšo, eupša se ke nago le sona ke a go fa. Ka Leina la Jesu Kriste wa Natsaretha, emela godimo gomme o sepele.” Gomme monna o lebeletše godimo gomme ga sa nke a botšišolla selo ka yona. O no emelela gomme a sepela. Ba be ba le banna ba go hloka šedi le go serutege. Eupša Beibebe e rile, “Ba be ba ba lemogile, ka gore ba tsebile ba be ba bile le Jesu.”

⁸⁰ Ngwanešu, ge lefase le tseba gore o bile le Jesu, ge o ka kgona go phela bophelo bjo bo bjalo bja go se otswafale ka go lefase le la bjale le ka go leswiswi le, gore lefase le a tseba le go kgona go bona gore o bile le Jesu; ge wa makgwakgwa, mmalegogwana wa kgale wa mahlapa wa mokgotheng a ka kgona go ba mohumagadi, a hlatswitšwe Mading a Kwana; Modimo o a hlatsela gore O a phela.

⁸¹ Tšeа setagwa, se se lego tlasetlase moo a ka se tshepagalelego mosadimogatša wa gagwe, se se tla swarago bana ba sona bošaedi, le go tšeа dijo tša bana go tloga tafoleng, go e šomiša go mmalegogwana. Anke a hwetše Jesu gatee. O tla mmona a bowa, boka Madira, yoo a bego a le ka monaganong wa gagwe wa go itekanel a gomme a apere, go masea a gagwe le mosadimogatša wa gagwe le go baratwa ba gagwe. Ka nnete.

⁸² Nako ye nngwe ya go feta, e ka ba mengwaga ye masomenne ya go feta, ge mabodumedi a lefase a kopane, gomme ba go fapania ba emeletše le go bolela. Gomme Mohammedan a boleletše bodumedi bja Mohammedan. Majain a boleletše Majain; Mabuddist a boleletše Buddha. Gomme ge ngaka ye nnyane, ke lebetše sefane sa gagwe ke sefe, feela mo nakong ye. Ke be ke tseba leina la gagwe, eupša ke le lebetše. O boletše go emela Bokriste. Gomme o boletše kanegelo ya Mohumagadi Maccabee wa Oklahoma, ka Amerika.

O be a befile kudu gomme le fasefase kudu, go fihla ebile ge ba ile go mmolaya, ebile ba be ba ka se bee diatla tša bona go yena, o be a le mahlapa le yo mobe kudu. Ba bile le yena a golegilwe ka molato: go kgoga sikara; go otlela karikana; le go roba me—me—me melao, direkoto tša Oklahoma, ge a fetile go kgabola mokgotha, a otlela hlogo tše nne tša dipere. Gomme o be a le yo mobe kudu le go tšhilafala kudu go fihlela setšhaba ebile se sa tle tikologong moo a bego a le gona; bontši kudu, go fihla ge babolai ba eya go mmolaya, ba be ba ka se mo fege. Ba nno tšhela sekontiri le mafofa go yena, go mmolaya.

Gomme ge moreri yo monnyane yo a efa kanegelo ya gagwe, ka mokgwa wo bjalo, go fihla a bile le batho ba dutše mantsokaneng a ditulo tša bona, ba theeditše se se tla latelago. Ge a fihla go seo: yo mobe kudu, wa ditšhila, wa fasefase, go fihlela melao ebile e sa nyake go mo kgwatha, o be a le tlase kudu. Yena diabolo wa hele o tla gana motho yo bjalo, go nyakile, ka tsela ye a anegilego kanegelo. Morago o rile, “Bakgomana ba mabodumedi a lefase, a bodumedi bja lena bo ne e ka ba eng e ka go hlwekiša diatla tša Mohumagadi Maccabee?”

⁸³ Yo mongwe le yo mongwe o dutše tuu. Morago o phaphathile diatla tša gagwe mmogo, gomme o tabogetše godimo moyeng. O rile, “Letago go Modimo! Madi a Jesu Kriste a ka se hlwekiše diatla tša gagwe feela, eupša A tla hlwekiša pelo ya gagwe le go mo dira Monyalwa wa Gagwe.” Ke le botše:

Mogau wa go makatša! modumo o bose bjang,
Woo o pholosítšego leratha boka nna!
Nkile ka lahlega, eupša bjale ke hweditšwe,
ke be ke foufetše, eupša bjale ke a bona.

Ke mogau woo o rutilego pelo ya ka go boifa,
E bile mogau o imolotšego dipoiifo tša ka;
Mogau wola o bonagetše bohlokwa gakaakang
Iri ya pele ke dumetšego!

⁸⁴ Ka nnate. “Re ka phonyokga bjang, ge re hlokomologa ye bjalo?” O hlokomologa go ja, o tla hwa. O hlokomologa go tšeka mo khoneng, o tla thula. O hlokomologa go gama kgomo, e ka gweta. O hlokomologa meno a gago, o tla ba le ona a tomotšwe ohle. Ka nnate. O patelela go hlokomologa ga gago.

⁸⁵ O Tabarenekele ya Branham le lena baeti, anke ke le botše se sengwe bjale. O hlokomologa go paka ka letago la Modimo, o hlokomologa go fa Modimo tumišo le letago, o tla ikhwetša wenamong o tonya, fomale, le go kgeloga, le lengwe la matšatši a. Efa tumišo go Modimo. “Re ka phonyokga bjang, ge re hlokomologa phološo e kgolo bjalo?”

⁸⁶ Go ba thari. Ke nno direga go lemoga Ngwanešu Thom, yoo a sepeletšego morago fale. Re tla tswalela le go tšwetša ye pele bošegong bjo, Morena ge a rata.

A re rapeleng feela nakwana.

⁸⁷ Tatawešo wa Legodimong, go Wena go be ditšhegofatšo, le ditumišo, le tlhompho, le letago, le bohlale, le thata, le maatla neng le neng. Oo, go Kwana yela yeo e dutšego Teroneng, dipušo le mebušo le se sengwe le se segwe se filwe go seatla sa Gagwe. Ge A tsošitšwe go tšwa bahung, bakeng sa tokafatšo ya rena, O goeleditše go lefase, “Maatla ohle ka Legodimong le lefaseng a filwe ka seatleng sa Ka. Eyang, kagona, ka go lefase lohle gomme le rere Ebangedi.”

O Kwana e hwago e rategago, Madi a Gago a bohlokwa

A ka se tsoge a lahlegelwa ke matla a Ona,
Go fihla Kereke ya Modimo e rekolotšwego
E phološwa, go se sa dira sebe gape.

⁸⁸ Re thuše, bjalo ka badiredi, go boneng gore re nyaka bontši kudu; ka fao re swanetšego go ba le kereke, re swanetše re be le *ye*, re swanetše re be le se sengwe le se sengwe.

⁸⁹ Basadi ba rena, pele ba eya kerekeng, ba sa ipitša le bjale Bakriste bonabeng, ba tla swanela ke go ba le mohuta o rilego wa roko, goba go swanela go apara botšhephi kudu.

Gomme bareri bohole ba tla swanela go ba le tšhelete ye ntši kudu pele ba ka tla, gomme se sengwe le se sengwe se swanetše go ba *bjangbjang*.

⁹⁰ O Kriste, ge ke bala fa, “Ka fao ba nenerilego gohole, ka mekgopha ya dinku le mekgopha ya dipudi, ba phetše ka meleteng ya lefase, le maweng.” Ba nenerile gohole, ka tlase ga tlhomaro ye mpe, gomme, efela, ba hweditše Tumelo, ka tlase ga bodiredi bja barongwa. Re tla phonyokga bjang, ge Morena Jesu a re fa magae a makaone, le dikoloi, le diaparo, le dijо? Gomme re a ngunanguna. Re dula tikologong. Re a tšwafa. Ga nke re leka go ya ntle le go dira se sengwe ka yona. Re tla phonyokga bjang, Modimo?

⁹¹ Oo, ke a rapela gore O tla tšuma diphenyego tša fešene ya kgale ka pelong ye nngwe le ye nngwe, mosong wo, Morena, gore batho ba ke ba itsotsorope. Anke re šome ge seetša sa mosegare se sa kganya, gobane letšatši ka pela le a nwelela. Le tlhabologo

e a ya, gomme ga go sa tlo ba le nako gape. E tla logaganelā ka Bokagosafelego.

⁹² O Modimo, efa lehono gore re ye ka pono ye nanana, ka bohlale, ka kwešišo, go tseba go batamela badiradibe bjang le go ba tliša go Kriste. Ekwa thapelo ya mohlanka wa Gago, Morena.

⁹³ Ke a kgopela, ge eba go ne e ka ba ofe fa, yoo a sa tsebegō Kriste bjalo ka Mophološi wa bona, a o ka phagamiša seatla sa gago gomme wa re, “Nkgopole, Ngwanešu Branham”? A o ka no phagamiša seatla sa gago, wa re, “Nkgopole. Ke nyaka go ba Mokriste. Ga ke nyake go e hlokomologa gape”? Modimo a go šegofatše, morago fale, mohlomphegi. Yo mongwe gape? E re, “Ke nyaka go phagamiša seatla sa ka, Ngwanešu Branham. Ke nyaka go amogela Kriste, bjalo ka Mophološi wa ka, ke hlokomologile, nako yohle. Oo, ke ya kerekeng, kgonthe, ke wa kereke.”



BAHEBERE, TEMA YA BOBEDI 1 NST57-0825M
(Hebrews, Chapter Two¹)
SERISI YA PUKU YA BAHEBERE

Molaetša wo ka Ngwanešu William Marrion Branham, setlogong o abilwe ka Seisimane ka Lamorena mosong, Agostose 25, 1957, ka Tabarenekeleng ya Branham ka Jeffersonville, Indiana, U.S.A., o tšerwe go tšwa go theipi ya go gatišwa ya makenete gomme o ngwadilwe ntle le go fokotšwa ka Seisimane. Ye ya North Sotho phetolelo e ngwadilwe gomme ya phatlalatšwa ke Voice Of God Recordings.

NORTH SOTHO

©2021 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE
58 DISA ROAD, ADMIRAL'S PARK, GORDON'S BAY 7140 WESTERN CAPE
REPUBLIC OF SOUTH AFRICA

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Tsebišo ka tokelo-kgatišo

Ditokelo ka moka di bolokilwe. Puku ye e ka ngwalollwa godimo ga sengwalolli sa ka gae go šomišwa ke mong goba go fiwa ntle, mahala ntle le tefo, bjalo ka sedirišwa go gaša Ebangedi ya Jesu Kriſte. Puku ye e ka se kgone go rekišwa, go tſweletšwa gape ka bopepetla, go romelwa go website, go bolokwa go sedirišwa sa go bušetša, go hlathollelwa malemeng a mangwe, goba go šomišetšwa go kgopela ditſhelete ntle le tumelelo ya go ngwalwa ya Voice Of God Recordings®.

Tshedimošo ye e Tseneletšeng goba materiale yo mongwe o leng gona, ka kgopelo ikopanye le:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org